

Gelombang 'Arab Spring' Tak Akan Berlaku Di Malaysia - PM
mStar Online
Jun 08, 2012
Oleh DERRICK VINESH

KULIM: Perdana Menteri Datuk Seri Najib Tun Razak menolak teori yang mengatakan bahawa gelombang 'Arab Spring' akan berlaku di Malaysia kerana kerajaan Barisan Nasional (BN) bukanlah pemerintah yang kejam.

Beliau berkata, apa yang dinyatakan tokoh Islam dunia, Sheikh Yusuf Qardawi mengenai pemberontakan 'Arab Spring' hanya dimaksudkan untuk Libya dan Mesir di mana berlaku pergolakan politik di negara-negara berkenaan.

"Ia bukan untuk Bahrain, Qatar, Arab Saudi, Malaysia atau Indonesia.

"Kita (Malaysia) bukanlah kerajaan yang kejam, malah Akta Keselamatan Dalam Negeri (ISA) telahpun digantikan dengan Akta Perhimpunan Aman.

"Sesiapa saja boleh mengadakan perhimpunan secara aman termasuk pembangkang tetapi ia tidak boleh melanggar undang-undang," katanya selepas merasmikan program Jelajah Janji Ditepati di Taman Teknologi Tinggi Kulim (KHTP) di sini, Jumaat.

Kira-kira 30,000 orang menghadiri program tersebut.

Terdahulu, beliau bertemu penduduk tempatan selepas selesai menunaikan solat Jumaat di masjid Air Merah di sini.

Hakcipta Terpelihara © 1995-2012 Star Publications (Malaysia) Bhd

Source:

http://mstar.com.my/berita/cerita.asp?file=/2012/6/8/mstar_berita/20120608175329&sec=mstar_berita